



So495

# KBCI Thuso

Regd.No.19134/88  
<http://www.kbc.org.in>  
NAI/220/99  
No-G-4/Regd.Magazine  
/KBCThuso/MNP-81

Kum 57 Ihinna

Lhalam/September 2020



# Christian EDUCATION

OCTOBER EVENTS

Youth Day - 04  
MBC Day of Prayer - 11  
Pastor Tour Exchange - 01-31

"Kapa theng, ini pumkhat ihi bang a amaho jong  
pumkhat ahitheina ding un, Nangman amahohi hong in"

John. 17:11



**KBC Development Section makaina noija  
Lockdown ten kilnon in Sanitizer leh mask hopdohna ana um in ahi**



**KBC pumpi a Sum chedan vettoha ana  
um jouvin Ahinkisah lalpi ho jousen Office mun ah ankong  
sokhomna ana um in ahi**



**Boina tampi umjongleh Pathen heng ah Anthah lhun  
Maicham mun phabep a ana che lha in ahi**



# CONTENTS

THUMAKAI HO

Black September/ <i>Editorial</i>	2
REPORT ON EDUCATIONAL STATUS/ <i>Rev. Dr. M. Thonghosei Haokip</i>	4
KAANI, COVID-19 LEH KUKI TE KHANKHO/ <i>Pastor Thangneo Haokip</i>	7
CHRISTIAN HINKHO LE KITAHNA/ <i>Dr. Seikholal Kom</i>	10
Mission Column	12
Men Column	16
Youth Column	17
Development Column	18
STS Column	21
Office Diary	24
Reports	26
Hetna Belap	29

## EDITORIAL BOARD

<i>Chairman</i>	: <i>Rev. Tonglet Haokip, President KBC</i>
<i>Editor</i>	: <i>Dr. M. Thonghosei Haokip, General Secretary</i>
<i>Joint Editor</i>	: <i>Rev. Onkho Haokip</i>
<i>Contributing Editors</i>	: 1. <i>Rev. Thongkholun Touthang</i> 2. <i>Rev. Lamkeng Lhouvum</i> 3. <i>Rev. Tongmang Haokip</i> 4. <i>Pi Lhingbem Haokip</i> 5. <i>Rev. Lunghosei Tuboi</i> 6. <i>Rev. T. Thanghosei Haokip</i>
<i>Design &amp; Layout</i>	– <i>Pu S. Lenboi Haokip</i>
<i>Circular Manager</i>	– <i>Pi Vahboi Baite</i>
<i>Recorder</i>	– <i>Ms. Nemhoichong Haokip</i>

## THUSO LAHMAN

Church/Organisation/ Department .....Rs. 300/-  
Individual ..... Rs. 200/- (Post a Rs. 250/-)

Indian Overseas Bank, Imphal Branch  
A/c No. 073201000000350 IFSC No. IOBA0000732

The General Secretary,  
Kuki Baptist Convention,  
Opp. DM College, Imphal 795001, Manipur  
email: kbcindia@rediffmail.com

Advertisement bolnom hon Mobile No. 70895979446 Contact thei.  
Circulation to kisai lam Mobile No. 9862107393 bol ding.



## Black September

Editorial

John 14:15

**“Vo Jerusalem, nangma kasuhmil leh kakhut jetlam langthin umjeng hen! Nangma kagel-doh louva ahile kadang chungga kalei behden jeng hen. Kakipa khongkheh gei sanga Jerusalem sangjoa kagel lou leh! Psalms 137:5,6.**

*Amasatah in muntina um Kuki Christian jouse ahideh a KBC member ho jouse chungga iPakaiyu Jesu Christa minin salaam kahin pecheh uve. Tulla asunga thupi chomchom tichu Teachers'Day (Sep.5) leh adang dang umjong le eiho nam mite a dinga Iha poimo/suhmil thei hilou khat ahi. Hiche lhahpumpi hi Black September anakisah in, nisim 13 nikhohi Black Day tin akihei.*

*Ipi jeh a hiche Iha le nikho kisah ham ti hi aneopen geiyin jong ahetsa le amil joulou khat chu ahitai. Israel te BC 597 le 538 kihak vel chun Babylon te henga sohchangin ana kitollun, hiche phat sunga agalmiten Zion la sahsah ding agot u le asah nom louvu ahi. Hijeh a chu chungga Bible chang itah-doh u khu ahung hitai. Amaho dinga Jerusalem chu suhmil theilou ahi.*

*Eiho jong 1993 kuma kimang pan ahin, tukumhi kum 27 lhinna chu ahitai. Hiche jong mihemte lunglaiya manglou laiya tukum adeh in March lhakim don (16th March) nin Chahsad Khopi chu avella achen khompi hon ahin hal lhauvin ahi. Chuleh, chomkhat jouvin Covid-19 toh kisaiya lock-down curfew ima ahung kipan pai ngalin ahile kihutona le kivilto theine ana um tapon, tuni geiya koima adeibanga chat theilou ahitai. Hiche Sahnit Nikho jeng jong kumdanga banga hou-in ham ahilouleh Community Hall hama mi tamtah mankhom theina ahikit tapoi.*

*Imauva thudoh len khat chu: Hitobang nikhoho hi eiho Christian tia kiminvo hon iti ihetjing diu ham? ti hi ahi. KIM dinmun vang chu, thilse bolt-en kisihna le boldinga kilom abol tokah uva bol jing ding ahi atiuve. Eiho lah a hou lamkai khat le nin hiche hi Black ti sanga White tiding ahi atiuvin khat le khat chamna lampang joh a man dingin aseiyun ahoilheh chu ahi. Hiche chungchona anikho geldoh jing na dinga chu kimkhat in Hospital a Thisan (Blood) donate bol ding atiuve. Amaho gelin, 'hiche nikho hin mihon lungsetna beiyin eina that uvin, keihon vang miho ngailut na in ka thisan kapeuve' tina ahi atiuve. Hichehi gelthei tah khat chu hipontem? Hiche tilou lamchom choma jong aphalama geldohna thei um ding kinep ahi.*

*Lungluttah a sim jouse chungu Pathen vangpeh chang taken.*

# KUKI BAPTIST CONVENTION REPORT ON EDUCATIONAL STATUS

Rev. Dr. M. Thongkhosei Haokip,  
General Secretary/ In Charge, Education Secretary, KBC

## ARTICLE

*Kuki Baptist Convention in School le College anei vangin policy kicheh tah aumlou jallin minsetna le boina akito-hjingin ahi. KBC in angaichatna het jeh a institution ho kiphutdoh a kichepi hilouvin, midangin abol lal ho eihin not doh jeh uva pamai isah man uva ima geltoh dat dat louva isanuva ibol jeng jeh u chun abul kiphuna umlou to-bang a kinbolna ihin neiyu ahitai. Ahin, ipijeh a themjilna ikhoh sahdingu ham? ti thudoh pipen hi hichen ihin chepi nunguva jong donbut louva kium ahitai.*

Ipijeh pena themjilna ikhoh sah diu ham ti hi abulphuna pen thudoh ahitoh kilhonna hiche hi hung kiguonga ahi. Themjilna lama pan ilahna ding jeh u hi Bible thupeh juina, Tahsan kiphu detna jeh chule houbung khandouna ding jeh pen ahi. Soldohna Len (The Great Commission, Matt. 28:18-20) na a "Hiche jeh chun nangho cheuvin namtinna mi jouse seijuiyin gasem un ..." ati hi themjilna munphase-ma hiche thupeh bulhit ding ti ahi. Hichehi tua pat a houbung in mission natohtah tah a gel ding atina ahi.

Anina a, Deut.6:6 na a, "Chule hichengsehi nangman ... abon cha nachate naseipeh a lunglut mongmonga nahil jingjeng ding ahi" ati hin itahsannau phudet jing angaidan aseiyin

ahi. Hichehi insung goh hilouva mission school hoa toh doh tho ngai ahi. Chule, themjilnamun ineilou uva chate/chapang ho midang mission ho bolna school hoa akaijingu le amaho thuhilna a chu lunglutna ahin neidiu, apa-anute khang kichai leh hiche mission a achop lutna diu chance lentah aumin, KBC khonung a khantou sanga kkeh suh najoh hung hiding ahi. Hiejeh chun, KBC aumjing ding ideiuva, akhantou ding ideiyu le hiche themjilna hoa kikumlutna (intervention) ineiyu angailheh tai.

Hiche ho jeh a themjilna mun phatah ho phudoh ding ti vai khonung hijong le hetdoh a mission natohna phatah a bol ding ti hi tutua Convention lunggel le plan ahitai.

Tuchan hin KBC noiya themjilna hi thumbou akineiye, hiho chu: (1) Dr. Colvin Academy, Moreh – 1972 kuma Moreh Baptist Church in ana phudoh a, 1981 vella KBC ahin pehdoh uva, phat tinna office a pat a headmaster ding kisolpeh jinga anahie. Colvin a kona hungkhanglen chapangho khonunga hetthei tah tah phabep aumdoh tai. Doctor, Cricketeer, professor, engineer, kiti ho phabep aum uve. Hicheho lah a Dr. Lalit MBBS, Dr. Semkhopao Mate, MBBS (AIIMS, Delhi), Rev. Dr. M. Thongkhosei Haokip, B.Com, MA, BD, M.Th, D.Th, tumasanga Assoc. prof. hiya tutua KBC GS hi chule adang tampi jong ahiuve. Class I apat a class X (Ten) gei ahin, State board a co-ed a kibol ahi. Tumasang jep chun chapang 700 gei anapha'n ahi. Colvin extension khat Haolenphai ah aume. Tutua Headmaster Pr. Haopu Haokip, BD, M.Th ahi.

(2) Kanggui Christian College, Kangpokpi – Namboi laiya MTC compound a hung kiphudoh anahin, MTC Imphal a kona Kangpokpi akichon ding phat a KBC te khut a hung uma, Class XI & XII simna le BA/BSc level simna thei ahin, jilkung ho jong qualified tah tah ahiuve. Munnom tah a um ahivangin debang tah in class teho kilahna aum thei beh hih laiyee. Pathenin CEB le lamkaiho chihna apheh a

hiche college hi nampia ding le student community a dinga phatthei channa asoteiya, city lah a jilnamun hoiho toh kibanga aumthei na ding hi deisah ahi. Tutua Principal Dr. Doulet Khongsai PhD ahiye.

(3) Dingpi Mission School, Khangbarol – DMS hi 1999 kuma KBC in ana phudoh a Headmaster jong anasola anahin, chomkhat jouvin boina jeh in ana chejom thei tapon, ahin 2020 kum a pat in akitung doh kit in ahi. Tulaiya Covid-19 um jong leh class phatah in ache lha jinge. Tumasanga hiche school a hung khanglen khat jong tu le tu hin eiho KBC Pastor a apang thei tai. Gamsung huh na ding le Pathen natohna a lolhing tah khat ahitheina ding hi deisah hi. Tukuma kithah pat kit ahitoh kilhonin Class I to IV gei aume. KBC Mission Board in jilung 2 achop a, haosapun khat achop a, Education Board in achop ahi. Tu le tua Head Master hi Mr. Hengoumang Doungel, BA BD ahiye.

TAONA A GEL DOH DING HO:

- Jillaiho, Jilkung ho leh achate/family ding
- Jilkung hia lhalo lhomjeh a sum tamna munhoa hin kho lamvai jilkung ho ding
- Houbung le society'n Jilkung ho chung a abolding dol u

ngailut na le jana apéh jing thei na ding

■ 2020 KBC Christian Education Board noiya themjilna mun in-  
eisunu – Dr. Colvin Academy,  
Moreh; Kanggui Christian Col-

lege, Kangpokpi; and Dingpi  
Mission School, Khangbarol hoa  
ding

■ Dr. Colvin Academy in 2022 a  
Golden Jubilee tohguon le sikul  
mun akicheh thei na ding.

## TEACHERS DAY



KBC sung'a Institution um noiya minchongho hin ama ama umna mun le jokham cheh in Teachers Day ana mang cheh uvin ahi.

1. Kanggui Christian College, Kangpokpi, KBC No. 05
2. Dr. Colvin Academy, Moreh, KBC No. 15
3. Shalom Theological Seminary, Saitu, KBC No. 04
4. Kids English School, Govajang, KBC No. 11
5. Dingpi Mission School, Khangbarol, KBC No. 13
6. Faith Academy School, Joujangtek, KBC No. 07

## JUMBO BOX



August 21, 2020 (Friday)  
Chassad vangkho a vangsetna  
anatoh khomite thilkeu lokeu  
leh sil le chen koina ding thei-  
louva gentheitah a ana um  
chu CRPF EIMI KILOIKHOM  
hon jumbo box inson a achan  
diuvin Jumbo Box 147 pieces  
anachoh peh uvin anathot  
uvin ahi.



# KAANI, COVID-19 LEH KUKI TE KHANKHO

Pastor Thangneo Haokip  
C/C National Games Village

## Sermon

(Bible a) Pathen in mihem te leiset vesui ding, asem hoi ding leh aga ne dia akoi ahi. Pathen in lei mihem te mopohna lentah apen ahi. Christian te, Kuki chate jong mopohna lentah eipeuvin ahi. Hiche mopoh na ei kipe hi tunia eihon isuh bulhit u hinam?

Imphal Hatta Muslim ho venga khangthah kaani addict khat ana mollem in ahi. A long op a hung ho tehse phabep in, "Nangin na nopsah na dia naneh ahin, nathem mo poi. Ajoh ho sumkol vei ahiu vin, athemmo pouve. Nang tunia nathat ho hi alei lhou ho ahivu," tin ana sei uvin ahi. Koima alei lhou umda leh, ajoh jong umlou ding, ane jong umlou ding ati nao ahie.

Kaani hi Kukite nam sunga kinel bautam na khat ahi jinge. Pathen in Ama mel hoina leh loupina thilsem kidang hoa kipat eimusah nom hou chu eihon iti imanachah uvem? Achunga Muslim ho thusei kho adih ahile kaani lei lhou ho kho tijat umtah ahie.

Kaanei lei lhou ho to iki houlim le mi anel jiuvin, them akichan jiuve. Amaho panna pen chu kaani hi ase ahileh ipi dinga Pathen in asem ham? Anchang jong ju a aki hon thei le anchang chu ase ahi, buneh jong chonset

ahi atiuve. Anchang hi ase ahipoi. Pathen in mihem oiva na dia asem ahi. Mihem ten amang khel tan, khamna thei, thina thei 'ju' aso u ahi. Pharmacy a kimu damdoi tampi mihem te damna dia kiseum ahi. Hiche lou mama chu mihem ten khamna leh thina a jong aman kit ahi. Hiche jeh a chu pharmacy lou ho kho ase kiti thei lou ahin, amang hon aman khel tenguleh ase ahi. Hitobang ma chun kaani hi Pathen in apha ding, vet dinga pahcha hoitah a asem ahi. Hinla mihem ten khamna thei, thina thei iso u joh ahi (thilpha chu thil phalou kiso ahi).

Tunia hitia mi nel a them akichan bang uva hi nikhat leh Pathen thu tanna anga adin tengleh hitia hi

Pathen chu a nelkal a them kichan thei diu hinam? 'Pathen kaani ase ahile ipi dinga nasem khoh ten ham' tia adonbut thei ding hinam?

Kaani lei akilho ding tengleh gambah lentah aki vatnam sel jie. Thingphung songphung aki tulhu jin, Pathen thilpeh jou anche jat chom chom ho aki sumang soh e. Jule va ten belding neilou vin hinkho genthei tah in amang jiu ve. Phat chomkhat jou tengleh hampa lou aki kap kit ji. Hampa lou hin leihao asumang jin, khonung a muchichi-vo ho tulut na thei ding asoji tapoi. Hiche hin khonung iki hinso theina diu leiset ho hi ei suhset peh taove. Abang khat in Kaani lei kalho lou le ipi kaneh ding ham atiuve. Kaani lei

alho masang a chu kum chujat pi ipi anabol a Pathen in ana vah va hin-tem? Thuchih Bu 20: 21 in gangtah a haosat hi gangtah a kichai ding tin kichentah in eihil uve. Sum ngailut hi setna bulpi jong ahi (1 Timothy 6:10). Tulai Christian khangthah ten hiche hi lung giltah a gel ding angai tai, khonung khankho ding igel leh mu athim in ahi. Pathen lunghanna na Kuki nam pumpi ichan khah diu ham tihi gellou thei ahita poi?

Tulai vangset lentah vannoi a natna hise 'covid-19' ahung lang tan, vannoi asuboi in, Kuki chate jong iboi dehset uve. Manipur gam sunga kaani lei habol pen hi eiho ihuive. Ichen nao gam jousea alei kilhou ahitai. Kaani lei a iphat hou isumang uvin, phailei (chang lei) ikhoh sah ta pouve. Hijeh hin tuchung covid-19 huilhi in eihin phah u hin neh le chah (adeh a anchang) ahung lhasam tan ahile thinglhang a chenga thinglhang lei lhou lou ho, sei dingin kaani lei a kisa lunggim ho neh ding lhasam in hinkho lungling lao vin amang uve. Ahile kaani hi nehthei mong ham? Kaani hi oiva na ahipoi ti kichen set ahitai. Tukum hi Pathen lungsetna jalin ki kumlhung ham ham nante. Ahin tukum boina asan jeh hin gam danga loubol mi hon ahina bang a lou alho theilou diu ginchat aume. Eiho thinglhang gam a phailei/thinglhang lei ilhou ho hi eiho nehding in aninglhing joupoi. Manipur pumpi a phailei kilhou ho jong Manipur gamsung a dingin aninglhing joupoi. Gampam a kipat anchang hung kipolut ahin, hiche ho jal a i oiva u ahi. Khovei tengleh ijem tin gampam a kipat anchang hunglut ta hih leh Manipur a hi iti nama jong leh kel lhah na ding hi

bailam tah ahi. Kaani lei lentah tah kilhou hen, sum le pai nengjong leh anchang choh ding aumlou tengleh sum le pai jong panna bei ahi.

Hijeh a hi khovei ding ngaito nan tukum changlei phatah a kibol ho hi ahampa pen hidu ahi. Ijem tin khovei kel lha hen lang hileh Kuki te a genthei pen ihung hi diu ahi ginchat aume.

Mi khat chun chonset akisih a, pentah na anei tengleh chonset anung bol ji tapoi. Hiche hi tahsan chate tahsan chu ahie. Tuni khamna thei a kivei police/narcotics hon amat ho Kuki chate atam pen tai (ma sang jep a chu Muslim te ana hiuve). Hiche hi nam pumpi a dia jachat um tah ahi. Kuki nam hi Pathen in phatthei eiboh nao asang in ahi. State inei pouve. Hinla state neiho sangin officers, sportsmen, chule gam le leiset a phatthei eiboh jouve. Hinla tunin 'Kukite-kaani bolte' tin min eihe taovin, jachat umtah ahi tai. Naga ten 'Kukite National Flower' tin jong asej pan taove.

Thinglhang lei a anche louhingaloo (potato), cobo (cabbage), etc ho itu leh ahoithej dan aje aumpoi ti akija jing e. Pachat umtah khat chu Joujangtek kho hi vetjui thej tah khat ahi. Haosate pan lahna jalin tunin kaani khelin aloo, cobo ho atu taovin ahi. Kaani ana kham jeh in inson khat le ni ana chao jongleh khosung Pathen in phatthei aboh e. Masang kaani kibol lai in hopsom pejou ana umpoi (ajeh chu sum le pai bat in ana dimset uve). Tunin me lei habol in abol uvin, Pathen in phatthei aboh uvin, kum khat a (inson khat in) hopsom dangka 40,000-60,000 ape jou taove. Hic-

hun avetsah chu kum khat income dangka lakh 4 – lakh 6 lang apha ti na ahi. Haosapu Pu Henkhopao Haokip hi pachat umtah ahi. Ama hin muntin a lhai le a muchi ho ahin tollut ahi. Lung in agut leh Pathen in ei panpi ti hi muchet ahi. Hiche hi thudih tah ahi. Hijeh hin Kuki chate dia Joujangtek vangkho hi role model khat ahungsoh tai. Min abol theile nangin jong nabol thei e.

Kuki Baptist Convention (KBC) lamkai hon khonung ikhankho diu gelnan Chief Minister pu ana kimu piivin, kagam uva kaani khel in lampi khat neigon peh uvin tin tepna aganei uvin ahile CM pu jong atha anomin akipah lleh jenge. Lamkai hon kaani lei lhou ho songkul a khumu vin atiu ahipoi. Hiche hetthem loujeh in mi tampi KBC lamkai ho chungu alung phamo lleh jeng uve ti thu jong ana kijai. Hiche hi hetkhel jeh ahi. Government in inop pou u leh manbei

(free) a muchi ho supply bolding ati joh ahin, hiche hi hetthem ngai ahi. Covid-19 hi Pathen thutep guilhung ahi. Christa hungkit na ding nikho anai mong mong tai. Kuki chaten ilam lhah hou, i hinkho man hou iki semphat uva, hah jongleh Christa a i hinkho ipeh uva, tonsot a amang thei lou ding gam a chu gou iki khol uva pha jo lou ham? Hiche lai a haosat na ho tulai drugs a kipat haosat na ho to tekah thei him him hiponte. Kaani lei lhou hon jong mi pengthah kahi atiuve. Mi pengthah in mi manthah na thei na atoh ding hi kilom hinam? Mi pengthah dihtah chun inchen hahsat jeh in ana bol khel jongleh adihpoi ti hi Christa lhagao vin ahetsah ding ahin, kish pai ding ahitai. Bible in nget le twi jin asuhmang thei lou ding gou vangam a joh kikhol in ati. Christian chate dia vangam hi seithem a lutthei hiponte. Kuki chate phate cha lung gelphat ahitai.

## KIPAPINATHUPHONHO



STS a konna Kipa umtah thuphon khat chu Centre Church Tujangwaichong Houbung hon Anthah Lop a ahin todoh u, Kolbu, Changmai, Mot, chule anche louhing tampi STS ho nehdingin eihung peuvin ahi. Hiche goh hilouvin, Centre Church Pastor pa Pastor Mangcha Tuboi in Tilkhouana Jong anei in hiche to lhon chun Houbung min in dangka 1000 Jong STS kithopi nan ape in ahi. Hitobang a lunggel them Tujangwaichong Centre church Pastor pa le Houbung miho jouse chungah STS in kipa thu sangtah in ahung ki sei e. Tujangwaichong Houbung Pathen in phatthei boh jing ta hen.

# CHRISTIAN HINKHO LE KITAHNA

*Dr. Seikhohal Kom*

Sibong Khudengthabi Baptist Church,  
KBC Gambih No. 15

## Sermon

Christian hinkho a hi isei nom pen ule jo hahsa isah pen u chu kitahna ahi. Alhangpia pengthah kahi ti jouse hi ivetleh neh le chah chung a thenna anei jeh chuleh, polam mitvet a Christian khat chonding lom bang a achon jeh mai mai anahi nom jin ahi. Ahin, Christian khat chu hiche ho mai mai jeh bouva chu Christa nungjui (discipleship) dihtah kahi tithei vang ahi poi. Miho muthei le mutheilou chung a kitahna nei pum a Jesu nungjui ihu ngai ahi.

Kitahna kiti hi imalam jousea ahiding bang leh Pathen deisah banga kho-sah ding tina ahi. Christian context a seiding hileh, Pathen Lekhabu theng in eihilnao lhakang louva um michu kitah tina ahi. Mother Teresa in Jesu nungjui hi a simple in, abei poi atin ahi (following Jesus is simple but not easy). Jesu nung ijui naova hi kitahna lhaso louva juinding hi ahahsapan hijongleh bollou theilou ahi. Thilpha khat le ni ijo mai mai jeh uva Jesu nungjui dihtah akihi poi. Polam mitvet dia kilom ihi tah jeh a pengthah tah tah kahi tai tithei jong ahipoi.

Tahsa thua vang selguh thei iselguh jou laiseuva good citizen kiki thei ahin, lhagao thua vang selguh aum laisea nominal Christian ihu tina ahi. Bible in polam mitvet dia apha dan a chon ho Pharisee (hypocrite) ati ihe sohkei uvin ahi. Achutile, selguh nei pum a Jesu nungjui ihuileh pentahna dihtah nei nailou ihi loudiu ham? Kitahna hi atamjon muthei hole midang hon ahethdoh thei ho chung ah bou ikitah un ahi. Hichu kitahna dihtah ahi poi. Kitahna dihtah chu ahileh, midang in namu louding hijongleh adih nabol chu kitahna nei kiti ahi. Christian te hin mihem mitvet a ahol le apha hisanga Pathen

mitvet dia apha hiding tup angai e.

Alhangpin thenna hinkho (neh le chah) hi selguh thei behseh ahi lou jeh in Christian atamjon ijou uvin, thending jong ingaito uvin ahi. Ahin, ingaitonao dihlou khat chu ahileh, mutheilou chung a kitahna beiya pengthah kahi itiu hi adih poi. Ju le sa, chep le muom ingol mai mai jeh uva pengthah kiki ahi poi. Christa nungjui ihi nauva hi neh le chah chung a kitahna; toh le tham chung a kitahna; itahsan na chung uva kitahna; thilpeh thudol a kitahna etc ho jouse chung a jong kitahna nei cheh ngai ahi. Igamsung uvah

kitahna neilouva pengthah atam in, hichu penthah ahi poi. Ikitah le kitahlou hi mi muthei le molphou nathei ahi jilou jeh hin Christian tampin igeldao (gelkhohlou) ji uvin ahi. Lhangphong tah a jukham khat chu pengthah lou dan in igel uvin, eihon molphou nalou thil tampi iselguh hou iman igel ji pouve. Kitahna kiti hi imolphou ding jeh a kitah ding, imolphou louding ahileh kitah louding tina ahi poi. Kitahna dihtah nei ihiuleh molphou ding hijong leuhen kitahna nei tah a ipan diu tina ahi. Mikhat kitah le kitahlou hi midang hon 20-30% bou ahedoh thei un, 70% vang eima bou hetthei na a um ahi. Tichu, ikitah ikitahlou hi atamjo selguh thei in aum e tina ahi. Kitahna hi selguh thei nading chance atam jeh hin Christian hinkho hi beilou ahi. Hijeh a chu, Pakai Pakai imoh ti uva kitahna beiya nungjui ihiuleh Jesun amelhetlou Christian ihi bep diu ahi (Matt. 7:21)

Kitahna dihtah chu epi ham itileh, achanga panding hijongleh Noah, Daniel, Joseph le Job ho banga kitah jinga umthei chu ahi. Miho muna a athenglou nisa nelou, hinlah guhthim a ne chu kitahna neilou lai tina ahi. Miho mitvet a minset ding deilou, Pathen mitevet dia khohsahna neilou Christian ihu hi kitahna nei nailou ihi lou diu ham? Eiho mihem lunghol ihipouve, Pathen lunghol joh ihi uve (Col 3:23). Ikitahnao chu Pathen mitvet a adih angai e. Mihem sanga Pathen ja le gin (respect & reverence) ding ahi. Naloi napai chuleh lamkai hon ahed ding jeh a apha le adih nabol mai mai ahileh akitah nailou nahi.

Christian khat dia kitahna dihtah chu naji le nacha ten ahedoh louding hijongleh adih nabol chu ahi. Hichu Christa'n ideisah dan u kitahna chu ahi. Pathen akona selguh thei ima aum poi, Ama mai a kilang lou thil khatcha aum poi ti hetjing apha (Heb. 4:13).

Chuleh, kitahna kiti hi adih tah a peh (give), adih tah a bol, adih tah a seiding, sihnei langnei na panglouva vaihop, chate neh dinga ideilou hou eiman nehrou ding tina ahi. Pehdoh thua (give) ikitah vanga sum iholnao chung a ikitah louleh adih kit poi. Adih dinpi louva maipha vet jong hi kitah louna chikhat ahi. Athemjo le ahoijo (qualified) khat sanga eima deisah khat panpi jong hi ikitahlou nao avetsah ahi. Hou lamkai ahilouleh Pastor hi a Pathen dei banga thusei sanga mihem lunghol na thu kisei hi kitahna hinkho manglouva Christian ihu avetsah ahi. Alomlou khat panpi, ichan louding khat chan, imu louding khat mu got tei tei hi kitahlou na ahi. Houbung lhagaova adammona seingamlou; lhagao thutoh kitohlouva ikhosah nahou le sum le pai ihol nahou seingamlou kiti chu kitahna neilouva Pathen nungjui tina ahi. Imopohna chung a kitahlou, hinlah Pathen natong dan a um jong ki-umda lou ahi. Kitahna panglouva Pathen nung jui thei ahi poi. Haosa, hou natong, lamkai chom chom hon ihet diuva phachu ahileh, ibol thei nahou hi thutah le kitahna apanlou laisea Christian lhem ihu tina ahi.

Tunia igam sung uva Government oja hi a ama thalheng a mi koi; exam

akhel a mi tousah; voter lists tam nadia adihlou le athisa ho list a kichon sah; NREGS a sum mutam nadia inbul list kisutam etc ho hi Christian khat bolding lom hilou ahi. Hiche kibol ho hi lhangphong tah a jousei ngam le gucha ngam ihu avetsah ahi bouve. Lamkai khat jong chun aseiding lom khat chung a-insung mite molphou ding jeh a lepdoh ahileh kitahlou tina ahi. Pathen thu hi sei a theng, sei a boh ahi poi. Jou le nal a kibol ho hi eiho Christian chate bolthei ahi tia igel nalai uvem? Christian chate chun ibol, itoh, ineh etc jouse Pathen loup nadinga bolding lomtah ahi (1 Cor. 10:31). Christa palai ihu hejing pum a kitahna lhaso thei ihi pouve. Bible in navah u miho muthei in kilang hen chutileh miten van a um na Pau avahchoi diu ahi ati khu thudih le thilpha iboldiu tina ahi (Matt. 5:16).

Mikitalhou hetdoh theina khat chu ahileh, hiche tobang michun achate jong ahil phatleh akam in hiltho mai mai in tin, kachondan bang in chon un ti ponte. Achate komah nisa neh in tin tin, aman vang aneh chu aphilou ahi vang in them kichan ding ahi. Kitahna neilou ho hi ahangan ngam pouve. Kitahna nei michun ahindan le ama khosah dan ho chun midang in kihilna anei ding ahi. Bible a Paul in "keiman Christa umchan kajop banghin keima umchan jom uvin" (1 Cor. 11:1) ati banga kitahna nei khat chun Paul banga mi ihil ngam diu tina ahi. Kitahna nei Christian minu le mipa ihileh chate ihiltho sanga ivetsah diu joh ahi. Kihilna phapen chu vetsah ahi.

Lamkai/puitu (leader) kiti hi tahsa le lhagao anigel a mopohna nei ahi. Insunga minu le mipa hi puitu khat cheh ahilhon e. Puitu khat chun ahiltho mai mai abol a vetsah ding neilou hileh kitahna aneilou jeh hitei inte. Hijeh a chu, kitahna kiti hi insung, houbung, khosung le nam sung semphat nadia apoimo pen ahi. Kitahna panglouva kiloikhom houbung chu athisa ahi. Insung jong kitah na le thutah a kihilna neilou te chu mohseh ahi. Mikitalhou chu ase le aphilou akon a zalenna nailou ahi. Kitahna neilou michu chonset/ase toh kikhen lou, soh hi nalai tina ahi (John 8:32). Bible in "Amatoh kiloi kahi iti uva muthima ivaleu vangle, thu jousei ihu ahin, chuleh thutah chu nitlou ihuive" jong atin ahi (1 John 1:6).

Christian ten itup diu chu ahileh, Pathen lung suhlhai ding hi ahi. Pathen kipasi ding hi itup diu lomtah ahi. Ajeh chu, eihon kitahna neilouva Ama nungju dan a ium uhin Pathen akipah him him poi. Ama kipasi lou lai ihileh kipasi ding in kihabol ute. Eiho thutah a ichon teng uleh Pathen kipasi ahi ti geldoh jing pum in thutah a khosa ding in kihabol ute (3 John 1:4). Thutah chung ah Pathen akipah in, kitahna neite chung ah Pathen lunglhai ahi. Christian khat chu kitahna bei a Christian akitithe poi. Pathen ma-ang a santhei lomtah ihi nadiu leh nunga imolphou nalou diuva thutah jangkeiya mangcha hiding in kihabol jing u hite (2 Tim. 2:15)

Amen

## Mission Column

*Rev. Lamkeng Lhouvum  
Secretary Mission*

Pathen lungset in KBC Mission natoh ama chal jingin chuleh Mun chom chom'a um Missionary ho jong ama ama mun cheh a tom ngaitah in Pakai na atong jingun kipa thu iseijun chuleh Pathen kathangvah e. Chuleh muntin'a Houbung mite taona jal'a imachal jingo akimun Houbung mite chungu kipa thu kahin phonge. Noiija hin kiman chah na leh thil soh ho achom lang tah in kahin tah langin ahi.

### **1. Evangelist David Limbu Pakai kom'a choldo din eina dalha taovin ahi.**

Sikkim Demtam Mission field a Missionary Pastor Seiminthang @ Senpu Haokip family toh kilung toh tah'a Pakai natong Evangelist David Limbu chun tahsa damo na khotah jeh in angai cheng ajinu, le acha teni (Pasal khat leh Numei khat) chuleh atohkhompi cheng dalhan Pakai kom'a choldo di ana chetai. Tunia David Limbu in eidalhah u hi KBC Mission field Pakai na itoh naova dinga vangset umtah khat chu ahi. Hijeh chun mabana Pakai leng pi leija vaikon ding ama bana natong ding ahung kispes doh thei na din taona in gel doh u hite.

### **2. Elijah Prayer Mountain Washroom kisa machal jing:**

Pathen lungset in KBC in Elijah Prayer Mountain mun'a Washroom kisa chu amachal jingin ahi. Mistry natong ho jong gun chu tah in apang jingun ahi. Evangelist ho leh Missionary ho Lockdown a posting che thei lou in um jong leh Taona mol'a natoh na a gunchu tah'a apang jeh un kipa thu kahin phonge.

### **3. KBC Mission field Arunachal natoh machal jing:**

Pastor Haolenlal kipgen leh a inneipi Happily kipgen Bekhulian vilage a gun chu tah in House Fellowship ho leh Home visit chuleh ana adam lou ho vilna leh taopehna na anei jingun ahi. Pastor Nabin leh Team ho jong Danglat Baptist Church chol nga louvin Lockdown sunga jong Home visit leh personal counselling ho ache lha jingin Pathen thang vah in um hen. Pastor Seiminthang Kipgen leh family jong Tabitha Girls Hostel a Student ho um thei hih jong leh Missionary dang hot oh kitho khomin ama chal jingin ahi.

### **4. Evangelist Helun Chongloi dinga Jankhovah taopehna.**

Pakai lhacha Evabngelist Helun Chongloi hi Lol (Neck) natna jeh'a dam lou kijan chu January a patna tuni chan'a hi dei bang'a Aw gin

thei louva um ahi. Muntin 'a Houbung hon leh toh khompi chengin jo chanin vilna leh tao pehna anei jingun ahi. Kipa umtah in Pu Thangkholun Haokip Mission Board Vice Chairman pu leh aloi hon Pakai Lhacha pu damding dei na jalin 24th August 2020 janin jankhovah Taokhomna ana nei pi taovin ahi. Pathen in phat thei boh tao hen.

### 5. KBC Mission field Manipur Meitei field:

Meitei field a Missionary inei ho jong Lockdown um in Houin ho kai thei louvin um jong leh Pathen lungset in jo chanin Pernal counseling ho leh Home visit bolnao akimu jingin kipa aumin ahi. Chuleh tu lai lam cha chu Evangelist Paolam Kipgen mopoh na mun Pheidinga a jong Pathen thu kisei peh a lunglutna nei ho nasa tah in aboi piuvin Taona in geldoh u hite.

### 6. Kipa Thuphon :

KBC Centre Church New Lambulane Houbung miten Mission Account adeh a Houbung in amah o local maintenance a konin Elijah Prayer Mountain Gothol mun'a Cabin hoitah khat asaovin ahi. Houbungin kiphal tah'a hitobang KBC natoh na a gun chu tah'a pan ahilah jeh un kipa thu kahin phonge. Chuleh hoitah a ahin sah chai thei na divin tao na in gel dohh u hite.

### 7. Elijah Prayer Mountain mun'a Taona mang'a mi hung kal song jing:

- A) KBC No 8 Geljang Hb. Pu Tongsei gunchu tah in taona mangin ahunge.
- B) Nikho 29th August St. John English School class X & XII 2020 Batch ho nungah golhang ho taona manguin ahunguve.
- C) Pu George leh insung mite 3rd September nikho insung taokhomna aaneijun ahi.
- D) Songdo Nungah chapang thum 4th Sept Fasting prayer ahung neijun ahi.

### 9. Ni 40 An ngol'a Taona neita:

Pakai lhacha dia kipedoh sopi Boinu Mangte Tuinom B/C KBC No. 8 chu apasal Pakai lhacha pun athisan nungin , Pakai gam'a din ahung ahung vaikonin ECT CCpur M.Div ahin chajjin ahi. Tuhin Korea a M. Th simin ahi. Tukum August lha kichai chun Bible 11 vei asim chajjin chuleh July – August Lhasunga 40 days fasting Prayer anal an ahi. Loupina Pathen chang jing hen.

### 10. Taona in geldoh u hite:

- A) Missionary Seikholen Guite hi Tripura um ahin, tulai hi Gamsung miten inlanga kiche tan tin aga no jiuvin ahi. Ama hi tu masang'a chu Chem'a tha ding'a jong ana gotsao ahin ahin, Pakai min'a hang san tah'a pang jing ahi. Hiejeh chun tulai hi Houin sah ding toh gon anei-



jin sah got laitah ahin ahin sah doh thei na diuvin tao na in geldoh u hite.

B) Laos leh Cambodia gam'a Missionary a ana vaikon doh Ng. Lhingneikim @ Neoshi Haokip leh Ng. Lhingpineng @ Sherlyn chuleh Evangelist Lhingneilam @ Pretty tulai tah a hi KBC Gambih No. 2 Tour ache lai tah u ahin, Houbung miten tao na in gel doh jing hite.

Chuleh tubana'a jong Gambih hihen Houbung hijong leh Pakai Lhacha kiman chah pi nom hon jong ikiman chah khompi jing diu temna kahin neijun ahi.

### **11. KBC Secretaries hon Elijah Prayer Mountain vilna nei ta:**

Nisim 27th August nikho chun KBC Office Secretaries hon Elijah Prayer Mountain vilna aneitaovin ahi. Chuleh Taona mol'a natong ho tilkhouna leh Tao peh na jong Rev Dr. M. Thongkhosei Haokip in taopeh na aneijin ahi. Hiti chun kipah tah in natong ho vetlhah na akineijin ahi. Pathen in lamkai ho hin mang cha jing tao hen. Pathen in KBC Mission na itoh nao phat thei boh jing taken.

### **2. Seven (7) Days Fasting Prayer :**

Kipa pi umtah in Gl. Janglam Maovom cipur a kon in a-insung mite toh Eliza Prayer Mountain mun'a Fasting prayer ana neijun chuleh Ng. Kimboi Churanpur D. Phailen a konin 20-27th July 2020 sunga Seven days fasting Prayer ana neitan ahi. Kipahtah in 4.00pm 27th July chun Seven days Fasting Prayer gal jouvin inlanga akiletan ahi. Pathen in phatthei boh jing hen.

### **3. Jesus Film shows & Healing Ministry:**

26th July 2020 nikho chun Jesus Film show ministry leh Gospel Preaching New Cuttring ( TB Road) Arunachal Pradesh mun'a Pastor Nabin lamkai na in anache lhan ahi. Arunachal Mission field natong Pastor Lalboi Kipgen 29th July Pathen thusei leh ana damlou Mr Sorulum Towsik Bekhulian Baptist Church Houbung ajen ( Medicine treatment) pum'a Pathen natoh ama chal jingin ahi.

### **4. Nungah khat le Mipa khat Tahsan thah hung umta:**

Sikim Mission field Missionary Senpu Haokip Mission natohna atoh khompi Mr Armon Limbu apa dia taona ana ngaichat bang chun Apa chu 26th July nikho chun Pathen ahin houtan ahi. Chuleh Evangelist Kamal Leplen, Songphel Mission field a konin Ng. Khat strick Hindu family Background a konin 29th July 2020 ni chun Pathen ahin hou tan ahi. Ama nu hi Missionary pa chun ning kum lang'a kon'a Pathen thu a ahin houlim pi ahitai. Pathen thang vah in um hen.

### **5. North India India House Visit & Cottage Meeting Ministry:**

Pathen lungset in Pastor Amit & Sister Kevita Panjap Ministry noiya Lockdown ho um jong leh Ministry amachal jing thei akimun Thursday cottage meeting

ho jong achal jingin ahi. Pathen thangvah in um hen.

### 6. Kids Ministry Grace Bible Club:

Kids Ministry noiija kibol Grace Bible Club Rev Letminthang @ Mimin Haokip leh ain neipi Ms Ruby Haokip chun 11th July ni chun apan doh lhontan ahi. Hiche phat sunga hin Bible games, Memory verse chuleh Bible story seipeh na leh taona phat kimang ji ahi.

### 7. One whole night Prayer & Tree Plantation:

Achesa 21-22nd July 2020 nikho chun KBC Mission Board ho leh Missionary Evangelist mi 50 velling Elijah Prayer Mountain mun'a whole night Prayer leh Tree Plantation chu akineitan ahi. Kipa umtah hiche Tree plantation a dia

#### Thingkeh hin pe ho:

- Dr. D.D Haokip IFS, Addl.PCCF, Bamboo 150
- Ng. Esther Kom IFS, DFO / Churachanpur Thingkeh 200
- Ng. Chinpilhing Kipgen MFS DFO/ Kangpokpi

Thingkeh 600 ama ho chengin ngailut na neitah a eihin peh jeh un Thingkeh tampi aki tu lut in ahi. Chuleh Thinggai keh jong 50 akichon akitulut tan ahi. Pathen in phat thei eiboh jing taohen.

### 8. Washroom Kisa machal jing:

Elijah Prayer Mountain ngaichat ahi dung juijin, Washroom 2 leh Bathroom 2 kisa chu Pathen lungset in aki machal jingin ahi. Hiche a natong a pang Missionaries ho leh Evangelist chungsa kipa thu sang tah in aki phonge.

### 9. Tripura Mission Natoh machal jing :

Missionary Seikholen Guite Tripura Mission natoh na a Mission centre ding gam khat chodoh ta. Chuleh Lockdown sung'a ama salary a kon'a Anchang, Hawaii, chuleh adang dang acho in Pathen thu aseipeh ho hop dohna aneitai. Pathen lungset in tu hin atahsan thah mi 4 tuilut ding aumtai. Mission na toh hi gamsung anop pet keuseh a toh ding ahipon, ahin gamsung hahsat laitah a jong toh ding ahi.

### 10. G. Songlung Youth Camp:

27-30th July sunga KBC Gambih No. 4 sung'a G Songlung B/C mun'a Youth camp an ache lhan ahi. Missionary Paolam Kipgen, Ng. Lhingneikim @ Neoshi Haokip chuleh Gl. Jangminlen Vaiphei ho chu main speaker leh counsellor in apanguvin ahi. Pathen in kidang tah'a aman chah thu akijan kipa aumin ahi.

KBC Mission field ho Missionary ho gunchu tah'a Pakai na atoh jingu akimun kipa aum lkeh jenge. Abon chan report jong akibol joupon ahi. Hijong leh ana toh phat nao Pathen in ahen ahi. Pathen in hin mang cha jingo hen. KBC Houbung miten jong itao naova gun chu tah in pang jingo hite. Loupi na jouse Pathen na hi jing hen, Amen.

# Men Column

Rev. Tongmang Haokip  
Secretary Men Department

## 1. Batlui Member Fund & LRC 2017,2018, 2019, 1e tukum 2020

Pakai Lengpi leija tohkhompi Pateho , Pakai lenggam khan tounadingle ikiloikhomnao va machal na thei dingin kumsehle Member Fund hihen lang LRC hijongle Budget ikisemuvin, abangloi Chun tuni chan in Pakai lenggam natoh machal na thei dingin kipah tahle thanom tahin pehdinga lomho ipetheng jingun, achungchehuva kipathu ahung kiphongin, abang loi Chun tuni chan in peh dinga lomho jong ipetheng pouvin aphamo lheh jeng , hijeh hin, Member Fund hihenlang LRC hijongle, ipeh dinguva lomho, tuni channa Batna umhohi agennathei chana Pakai minna ihin pehcheh dinguvin temnale hetsahna ahung kin neije.

## 2. Lom Resource Centre (LRC) Day mana dinga temna le hetsahna.

KBC Even calender dungjuija tu ahung lhung ding Dt 20th September 2020 (Sunday)nihi Lom Resource Centre (LRC) Day ahitoh kilhonna Houbung miten Pakai minna phatah'a inaman cheh dingun temnale hetsahna kahin neije.

Lom Resource Centre munna hin tuchanin na akitong jing jengin ahi. Amun a Chawkidar/Care taker pa achengin niseh'in amanjong ajochan in na atongin, ningkum langa patna Thingphung, Gophung Champara, chuleh thingkeh jatchom Chom tapi akiput'in, tukumfin jong Aieng, Betou, Motphung phung 600 akitukit in, khonung leh Men Department Source income a hung pan dinghi kinepna len-tah ahi. Tumaban ajong thing phubeding, Inn sahbeding ahin hijeh chun Offering jong inbol cheh diuvin temna kahin neije.

### Lom Resource Centre Day Programme :

Thupi: "Aphutpale atwi chapapa chu thakhat ahilhona." I-Corinth 3:8.

- |                   |                                     |
|-------------------|-------------------------------------|
| 1. Conductor      | :Chairman Men Department.           |
| 2. Thangvahna tao | : Chairperson Women Dept.           |
| 3. Labung         | : Church Choir                      |
| 4. Message        | : Pastor/Head Deacond/Guest Speaker |
| 5. Kilhadohna tao | : Mipi achaiding M/E Chairman       |

### Toana a geldoh dingho :

1. Lom Resource Centre a/olhin na thei ding.
2. Thingphung kiput ho, Muchi kituho alohlin nathei ding.
3. Lom Resource Centre vetupma pang Chawkidar pan phatah avetkoljing nathei ding.

## Youth Column

### Bible Quest le Youth Day thu a Hetsah na

Amasa pen in muntin na um Houbung mite ho jouse Pakai jalla jana chang Pakai lhacha ho jouse Pakai Jesu Christa min in kangailut nao chibai kahin pecheh uve.

Kuki Baptist Convention Youth Department tohgon nanoija kumseh le kiboljing Bible Quest chu Pathen phat sah le e-chen nao Manipur State phatsah pih na ana hile ahunglhung ding October 11th Sunday-2020 nikhoteng le chelhah pi din akigong jing ahi, Echen nao Manipur Govt. vaihop na noija Covid-19 jeh a Lockdown kikoi ho jong ahung khe nem nem jing in hiti jeh chun hiche bikho a phate keicha a Exam ho alohin thei nadin i tao nao vah gel doh cheh u hite tin jong tem na sang pen kahin neijun ahi. Chule Exam peding'a kigong ho jouse jong lunglha dai na ima neilouva thanom tah a ina kigot jing diu vin jong tem na sang pen kahin neijin ahi.

Chujong le KBC Events Calender dungjuia ahung lhung ding 4th October 2020 nikho jong hi Youth Day nikho chu ahung hitan, munkhat khat na kaikhom na umthei hih laijong le kaikhom na kin kiman nathei munjouse a jong Houbung sung'a nulepa pile pute, chule Sopi ule nao ten jong hiche nikho hi neigel khoh pih uva, Chate ngailut na le khoto na neipum ma taona le tilkhou na a nikho a neina man pih cheh diu vin jong tem na kahin neijin ahi. Anoija hin anikho a kiman chah nading Programme kahin tah lang in ahi.

Thupi: Youth with a Vision (Genesis 37:19)

1. Vaihom ding : Local Youth Secretary
2. Thangvah na La N0 : Hb.La No.208
3. Thangvah na tao : Houbung Treasurer
4. Lem na Thusei : Youth Chairman
5. Labung : Church Choir/ BYD (Youth Day Lapi)
6. Speaker : Pastor/ Head Deacon
7. Kilhadoh na La N0. : Hb.La No.340
8. Kilhadoh na tao : Mipi Achaiding Speaker

Programme hi anop nathei chan na eima hon jong ina kistem hoi be thei cheh diu vin jong tem na kahin neijin ahi.

Hiche to kilhon chun KBC Youth Department ministry kithopi nale panpina ding in ijokham kham uvin Pakai min in Tolom jong kip-hal tah in neihin tokhom peh uvin tia Pakai min a kahung tao'u ahi.

Kakipah'e.

## Development Column

# KBC HOLISTIC DEVELOPMENT

~Rev. Onkho Haokip,  
Coordinator, Holistic Development Committee, KBC

### BACK TO FARM/ ABA FARM:

Innpi Chamber of Commerce Society (ICCS) le AbaFarm (Adonai Beacon Agro Farm) India in Back to Farm Project ahin nei uva Manipur gam sung'a houbungho toh kithokhom'a gambah phabep'a muchi (Ai-eng, Thiing, DrumStick, Lemon Grass) tuna'a kitkhom ding'a KBC jong temna ahin nei utoh kilhon in tohkhom ding akingaito jinglai ahin, koi tobang hichea lunglutna neiho KBC Office a Development Committee toh agang thei lam pen'a kijahmat thei hiding ahi. Aum ding dan:

*i. Eima gam sung'a Houbung in Farm lei bol ding ahi.*

*ii. Houbung in aman nom gampheng (acre/hectare) chu len hen lang neo jongleh Haosate akon phalna lekha um ding ahi.* Hiche Farm lei bol theina ding lekha chu kum 15 alhin tengleh kichai ding ahi. Kum 15 sung'a chu Haosate in Farm Lei chu thil dang'a aman lou ding'u ahi.

*iii. Muchi tu ding* (be, thing, lengmusel etc, kumkhat ahilouleh phatbih khat kah'a aga lothei) ho achi (seed) chohna sum 80% AbaFarm te in ahin pohdoh ding'u ahin 20% Farm lei bol Houbung in akipohdoh ding ahi.

*iv. Kumlhun ahilouleh Farm akon muchi gaho khoptup tengleh agaho chu AbaFarm in abonna Farm mun'a ahung kichoh kit ding ahi.* Mundang'a ga joh le le ngailouhel ahi. Alhangpia phatea Farm kibolna mun Hectare khat (Pari khat) sung'a muchi agaho chu Lakh khat'a akichoh ding'u ahi. Hiche sum Hopsom chu houbung Hopsom a lut ding ahin adangse chu Houbung in manna theitheiya aman chah ding ahi.

*v. Hiche Farm lolhin theina ding'a amun'a natong ding le vesui ding* chu Houbung mite hijing ding'u ahin Lhagao hinkho suhatna toh thoa Houbung in pan alah ding ahi.

*vi. Muchi hihen adang dang* (technical & scientific support) kithopinaho AbaFarm in mopohna alah ding ahi.

**vii. Houbungho in Farm lei abol'u chu** AbaFarm in phatah'a avet sui uva pan alah jing ding'u ahi.

Hiche tobang tohgon hoitah aum toh lhon in KBC gamsung'a houbungho abol nom le abol thei ding ium uleh kihoutoh'a chule Kho Haosate toh kinoptohna aum thei ding leh akin thei lam pen KBC Holistic Development (Dr. Seilenkap Haokip, Asst. Coordinator, Development Committee Mobile Number -8413034697 kom'a hetsahna hin nei ding in temna ahung kineiye. Tuchung'a hi Hectare them khat bou kimu ahitoh lhon'a min hinpe lut masaho in chanvou amu masat ding'u ahi.

### **SAMARITIAN MULTI-PURPOSE CO-OPERTIVE SOCIETY**

KBC Development Section noiya SMPCS a Loan anala'a chule lhaseh'a Loan Interest kisah lou laiho jouse in July lha sung'a hin sa doh cheh ding in temna le hetsahna ahung kineiye. Loanee-ho in boina anei khah ujongleh loan lahna ding'a Grantor'a ana pangho injong hin khohsah cheh ding in tem ihuive.

Loan chung chang'a het chenbe nomho in noi'a min le Phone number kipea hi doh cheh jing thei ahi. Chule koi tobang Bank Account akon Loan hinsa nomho in noiya Bank Account a hi hin thot jing thei ahi. Bank Account a hinthotho in Pay Slip chu Asst. Coorinator kom'a thot'a hetsahna nei ding ahi.

KBC Development Account

#### **ACCOUNT HOLDER:**

Samaritan Multipurpose Cooperative Society LTD,

#### **NAME OF BANK:**

The Manipur State Co Bank Ltd. Kangpokpi Branch, Manipur  
Account No. 70600083360  
IFSC Code: YESB0MSCB07

### **OFFICE A MASK HOPNA HUNG NEI**

Pi Chinneivah Haokip in KBC Office vilna ahung nei in Office Secretary-ho le Staff-ho jouse ding in Muh-tom (Mask) khat cheh ahop peh in ahi. Pi Chinneivah Haokip Pathen in phatthei boh jing taken!

## STS Column

# SHALOM THEOLOGICAL SEMINARY (STS) SUNDAY

(9th August, 2020)

Pakai Jesu Christa min a ngailut umtah houbung mite ho jouse, STS a konin ngailutna SALAM kahinpeuve.

STS Library Kehletna ding Tohgon

Pathen lungset jal le i-Theological College-u STS gelkhohna jalin KBC Worker hon lekhabu phachompi ihintoh doh tauvin, khatvei nivei hintoh doh jom jong aumin, avel vel a hintobe jong aumin, ahintoh khalou lai beh jong aumin, ahintoh doh ho jouse chungu Pakai minin kipa thu sangtah ahung kiphonge. Lungset tah in tuni chan a hintoh doh khalou lai hon jong hintoh doh teiyutin, pan lakhomute, tin Pakai minin temna le taona ahung kinei kit in ahi. Lekhabu koina ding Wracks 10 akichodoh kit in, hicheho jousea hi lekhabu koidim teiding toh gon ineiyun ahi. Chule Library a ho Xerox machin len khat to Desktop Computer (all-in-one) set 4 koitei ding

Worker ho jeng seh hilouvin, houbung miho jouse atoh thei chanin, Thelogy lekhabu ho khel khel hihih jongle (Secular lekhabu dan dang hijongle) STS library a koithe ding lekhabu toh doh thei jousen i-Bible College u tosotna le khantouna dingin pan lautin, hintoh doh cheh ute, tin Pakai minin temna le taona sangtah ahung kineiyin ahi. Koitobang khat in lekhabu todoh ding neihih jong leng lekhabu chohna dingin sum themkhat beh hinpenge, tia houbung hihen, mimal (Individual) hijongle STS Library a ding lekhabu chohna dinga sum hintoh nomho jouse jong Pakai minin kipah tah in lem ihijinguve. Ajeh chu, Affiliation kidel hi thonlouva muteina dia kigot angaiyin, kigotna dia poima thil tampi lah a Library (College a dia atingpi gu) suh bulhing ding jong hi thil thupi pen khat ahi. Hichehi STS a dia Budget inakai hou mai maiya kon a suh bulhit jou ding ahilou jeh in, Pakai min a ikitho khomuva, pan hatah a ilah khomuva isuh bulhing tei diuvin avel velin temna le taona ahung kineiyin ahi.

### Taona Ngaichat

- STS hi Serampore le ATA a Affiliation lah ding kiti ahin tu tua hi Serampore noiya Affiliation akidel khoh laitah ahin, thonlouva munaitei dia houbung miten Pathen henga hatah a taona iman jing diuvin ikitemuvin ahi.
- STS hi tuchan a mi in (Government insahsa) a temporary a kiumnalai

ahin, eiho mun (Main campus) a insahna natoh hi khovei (2021 kum) tengle pat tah ding tohgon ahin, gelbanga toh molso ahitheina ding tao'u hite.

■ Chule, STS a jilkung ho, Office staff ho, chule jil-lai hodia jong houbung miten Pathen henga taona ihin manpeh jing diuvin ikite-muvin ahi. Amaho chu

### Core faculty members

- 1, Rev. Dr. Paokhohao (Haoneo) Haokip,  
M.A, M. Th, Ph. D (Principal)
2. Pastor Ginneo Haokip,  
B.A, B.Th, B.D, M. Th (Registrar/ Academic Dean & V.P Incharge)
3. Pastor T. Jamthiental Haokip,  
B.A, B.D, M. Th (Lecturer & Accountant)
4. Pastor T. Seikhogin Haokip,  
B.A, B.D, M. Th (Lecturer & Men.s Hostel Warden)
5. Ms. Hat Mary Haokip,  
B. Th, B.D, M. Th (Lecturer & Women's Hostel Warden)

### Staff

1. Mr. Gingoumang Kilong, B. Th (Assistant Librarian Incharge)
2. Mr. Thangkhochoon Haokip (Care taker cum Peon)

### B. Th. Final Year Students

1. *Lhunginmang Kipgen, Baptist Church, Sipijang, KBC Gb. No. 4.*
2. *Letkhohang Haokip, Kuki Baptist Convention (KBC), Myanmar.*
3. *Awng Myu Latt (Scott), Kachin, Myanmar.*
4. *Mangjahao Haokip, Baptist Church, T. Laijang, KBC Gb. No. 7.*

### B. Th. Orientation Students

1. *Letminlen Haokip, Baptist Church, Twingamjang, KBC Gb. No. 9.*
2. *Lunminthang Haokip, Baptist Church, Lhangjol, KBC Gb. No. 4.*
3. *Thangkhogin Haokip, Baptist Church, Songphel, KBC Gb. No. 2.*
4. *Lenkhotinthang Haokip, Baptist Church, E. Mulam, KBC Gb. 19.*
5. *Letjahao Haokip, Baptist Church, B. Boljang, KBC Gb. No. 2.*
6. *Satkhogin Kipgen, Baptist Church, Songjang, KBC Gb. No. 6.*
7. *Kamkhogin Haokip, Baptist Church, Sijang, KBC Gb. No. 2.*
8. *Mangtinlen Kipgen, Baptist Church, Saisijang, KBC Gb. No. 19.*
9. *Thongminlun Guite, Baptist Church, Molpi, KBC Gb. No. 20.*
10. *Manchong Lalboi Zou, C/Church, Molnoi Area, KBC Gb. No. 16.*
11. *Manggougin Kipgen, Centre Church, Sapormeina, KBC Gb. 4.*
12. *Jacob Lhunginthang Haokip Haokip, B/C, Tujang, KBC Gb. 13.*
13. *Tinneihoi Haokip, Baptist Church, Songphel, KBC Gb. NO. 2.*
14. *Veikimnei Dounge, C/Church, Tujangvaichong, KBC Gb. No. 6.*
15. *Nengboichong Hangshing, C/C, Tujangvaichong, KBC Gb. No. 6.*
16. *Nemjakhoh Haokip, Baptist Church, Kotlen, KBC Gb. No. 7.*
17. *Lhingneihoi Haokip, Baptist Church, Songphel, KBC Gb. No. 2.*



Tuchan a Covid 19 jeh a hunglhung theiloulai Sikkim a kon numei khat le Assam (Karbi Anglong a kon numei khat (Ahung lhunthei lhonna dinga taopeh ding)

STS Share

Tukum (2020) a dinga STS Share houbung mi Baptized member khat a Rs 30/- (Rupees thirty only) ipeh diu chu tuchan a hinpetheng houbung phabep pi aumtan, apelou laibeh jong houbung phabep pi aumnaliyin ahi. Tuchan a petheng houbung ho jouse chung a Pakai minin kipa thu sangtah ahung kiphonge. Apeloulai jousen jong lungset tah a ihingel khoh-uva kumlhun masang ngeiya ihinpeh theng diuvin temna le hetsahna ahung kineiye; ajeh chu, STS a dinga houbung hoa kon a Share ipeh diu sun sun hi ahung lut soh louva ahile STS management hung hahsa lheh jeng ding ahi. Hijeh chun, tuchan a peloulai jousen lungset tah a ihingel khoh-uva, kumlhun kah a ihinpeh theng teidiuvin Pakai minin temna le taona sangtah ahung kineiyn ahi.

### **Theological Scholarship**

KBC in kumseh a ihinchepi jingu Theology Final Year simlaiho Scholarship pekhkam kham a inapeh jiu chu tua pat a Apply bothei kit ahitai. Aply bolding dan chu anoiya bangin ahung kihetsah e.

### **Apply bolthei dingho le amutheiding ho**

Senate of Serampor le Asia Theological Association (ATA) noiya B.D/ M.Div. a pat chunglam simho bouvin Apply abolthei ding, hicheho lah a kon a jong Second Class a pat chunglam Mark mujou hon bou Apply abol thei diu ahi. College kaina phatah a kikhol ding, Senate of Serampore le ATA noya phatah a kai (Fully fledged/ accredited) college a kaiho bou kipeding ahi.

### **Application form**

Application form hi KBC Office a Miss Chongneo Haokip, P.A to General Secretary, ahiloule Mrs. Vahboi Baite Receipt & Issue kom a muthei ahi.

KBC Whatsapp Group hoa kon a Soft Copy unupload hung kibol jong Download bol a Print boldoh thei ahi.

### **Application form pehlutna phat**

Application form pehlutna phat hi ageipen a 18th Decembers, 2020 chan hiding, hiche nunga ho kisang talou ding ahi.

### **Application form pehlutna ding**

Fill up kibolsa le Document ngaicha ho attached kibolna Application Form chu Miss Chongneo Haokip, P.A to General Secretary, ahiloule Principal, STS (khat pen pen) kom a peh lut thei ahi. Application Form Hard Copy a Submit theilou ding (Soft Copy a submit ding) hon, Soft copy upload hungki bol chu download bol a, prin doh a, form a kipe dungjuia angaicha documents (Second year changei Mark sheet/transcript, houbung Head Deacon/ Pastor's Recommendation letter, latest fee structure) ho pum a fill up kibolsa Application form chu Scan bol a Soft Copy a STS Principal pa hinthot thei ahi.

### Shalom Theological Seminary (STS) Share

Tukum (2020) a dinga STS Share houbung mi Baptized member khat a Rs 30/- (Rupees thirty only) chu houbung phabep le Centre Church phabep in ahinpe tauvin, tuchan a hinpetheng ho jouse chungu kipa thu sangtah ahung kiphonge. Chuto lhon chun, tuchan a apetheng loulai ho le apeloulai beh ho jousen jong kumlhun kah in hinpetheng teiyute; ajeh chu, STS a dia houbunga kon a share ipeh diu sun sun hiche hi ahung lut soh louva ahile nasatah a STS management hung lhasam ding ahijeh in, hingel khoh cheh utin, hinpetei yute, tin Pakai minin temna le taona sangtah avelin ahung kinei kit in ahi.

## Office Superintendent



Phat chomkhat Office Superintendent (OS) mopohna eina lahpeh'u Pu Khaijang Iha onga kin Office mun'ah akiman toh lhon in Pu Thanglal Touthang chu tu apat akilha ong kah sea ding'a Office Superintendent (OS) mopohna alah ding ahitai

## Office Diary

# Office Thuchinbu

(August)

August 09: Shalom Theological Seminary nikho ahitoh lhon in muntin'a houbungho in nikho manna ana nei uvin chule Office a Secretary phabep le muntin'a houlhacha phabep in houbung phabep ah kimanchahna ana nei uvin ahi.

August 16: Lockdown achalbe jing na ban'a tukhang'a muntin'a eima houbung miho toh Pathen houkhom theina ding in KBC SUNDAY ZOOM WORSHIP SERVICE masapen ana kibol doh in ahi. Hiche nikho chun Rev. Lamkeng Lhouvum, M/E Secretary in Pathen thua tilkhouna ana neiyina hi.

**August 18:** KBC Wholistic Development in Office mun'ah Farm lei bol nom houbung le kho phabep-ho kihoulimpina ana nei uvin ahi.

**August 19:** KBC Convention Executive Committee (CEC) in Office mun'ah Meeting ana nei khom uvin ahi.

**August 23:** KBC Meithaite Nikho ahitoh lhon in muntin'a houbung mite amang thei chan in ana mang cheh uvin ahi. KBC Office akon in Zoom Service mang cha in Ms. Lhingboi Kipgen, Secretary, Women Department in Thupi seinana ana neiyin chule Rev. Dr. M. Thongkhosei Haoki General Secretary in meithaite taophena ana neiyin ahi.

**August 28:** Finance & Property Committee makaina in Joujangtek Centre Church, KBC No. 7 muna'h Houin mun le Houbung dinmun ijakai suhtupna ana um in ahi.

**August 30:** KBC SUNDAY ZOOM WORSHIP SERVICE ana che jomg jing in Rev. Tongmang Haokip, Secretary, Men Department in Pathen thua tilkhouna ana neiyina hi.

**SEPTEMBER 2:** Finance & Property Committee makaina in Molkon Bazaar, KBC No. 3 Centre Church muna'h Houin mun le Houbung dinmun ijakai suhtupna ana um in ahi.

**SEPTEMBER 2:** Phat chomkhat Office Superintendent (OS) mopohna eina lahpeh u Pu Khaijang lha onгна kin Office mun'ah ana ki mang khom in ahi.

**SEPTEMBER 3:** KBC 90th Executive Council, G. Songlung Baptist Church, KBC No. 4 mun'ah lolhing tah in ana kichai tai.

**SEPTEMBER 5:** Kids English School Govangjang, KBC No. 11 mun'ah Teachers Day lolhing tah in ana kimang chaitai. Hiche achun Rev. Dr. Thongkhosei Haokip, General Secretary Chief Guest in ana pang in Pu DP Haokip, Guest of Honour in ana pang in Rev. Pillar Paosei Haokip, Gambih Pasotor chu Fucntional President in ana pang in ahi.

**SEPTEMBER 6:** KBC Event Calendar dungjui in mun tin'ah Education Sunday ana kimang in ahi. Rev. Dr. Thongkhosei Haokip, General Secretary cum Education Secretary in Zoom Service mang cha in thupi seina ana nei in ahi.

**SEPTEMBER 8:** Pi Chinneivah Haokip in KBC Office vilna ahung nei in Office Secretary-ho le Staff-ho jouse ding in Muhtom (Mask) khat cheh ahop peh in ahi. Pi Chinneivah Haokip Pathen in phatthei boh jing taken!

**SEPTEMBER 9-12:** Akhang dungjui'a Pathen thu le la chule Pathen natohnaa pan hatah'a lahbe theina ding in KBC Workers mi 30 (Frist Batch) in IT 4 IT (Information Technology for Internal Transformation) Training lolhing tah in ana bol chai tauvin ahi.

## KBC 90th EXECUTIVE COUNCIL



KBC 90th Executive Council, G. Songlung Baptist Church, KBC No. 4 mun'ah Delegate mi168 panna in lolhing tah in ana kichai tai. Council sung'a chun KBC Department, Board, Committee le Institution-ho akon in Recommendation ana kingailha in ahi. Hiche chung chon in Auditors akon in Half Yearly Audit Report ngailhah in ana um in chule Finance Commission akon injong Report ana kingailha in ahi.

Lockdown laitah hijongleh Gambih No. 4 lamkaiho le G. Songlung Baptist Church lamkaiho hapanna jal in Council ana lolhing in ahi. Council lolhin theina ding'a lampi chom chom'a panlaho jouse chung'ah kipa thu sangtah in ahung kiphong doh in ahi. Pathen in KBC phatthei boh jom jing taken.

~ **General Secretary**

# GAMBIH LE CENTRE CHURCH THU LAHKHOM

**JULY 15:** Covid-19 boina le Lockdown jeh in boina tampi umjong leh Centre church Tujangaichong in Chate Ngailut Huhhing na camp chu date 15- 21 july lha sunga lolhing tah in ana kibol lha tan ahi.

**JULY 25:** Vannoi boina chom chom aumjeh in Hou in kaithei lou jong tampi umjong le vangphat umtah in houbung tohgon Centre church Tujangaichong Revival Camp chu Date 25- 27 July lhasunga lolhing tah in program ana kinei tai. Revival camp ahin mi 100 chunglam in tukum apat a Tahsan kitepna (Faith promise) jochan a Pakai min a kum, chuleh lhaseh a pehding in kitep na jong ana sem tauvin ahi.

**AUGUST 02:** Centre church Tujangaichong houbung sunga 2020 Class X leh XII lolhin na nei ho mi 14 ho chu Pastor Mangcha le insung mite in Lolhin na (felicitation) Maicham sempeh na leh Chadon khompi na ana nei peh uvin ahi.

**AUGUST 08:** Vangset umtah in Pi Domkholhei Haokip Age 92 chun atahsa haihu kichai in natkit louna thikit louna tonsot gam jon in ana Che masa tai. Pi Domkholhei hi Rev.Dr. Haoneo Haokip Principal Shalom Theological Seminary apenna anu ahi.

**AUGUST 15:** Senam Baptist Church, KBC No. 16, a um Pu M. Jamkhothang Haokip nisim 14/8/20 alei hinkho alha a Pa henga Ana che masat na chung a tuni nisim 15/8/20 alongdamsa vui na kin gambih pastor in anei toh lhon in kin lolhingtah in akichai tai, pathen in a insung mite lungmon na apeh thei na ding in etaonauva kop cheh ute.

**AUGUST 18:** Karbi Anglong Gambih No. 18 Men Dept. in Joujang Baptist Church mun ah An Ngol taona ana mang khom uvin ahi.

**AUGUST 20:** C/C Kangpokpi Houbung in Worker Pensioner-ho Salary hoppehna le Taokhomna chuleh Missionary Pu David Limbu Condolence Service ana bol uvin ahi.

**AUGUST 21:** Centre Church Chavangphai in Houin Sat sunna ana bol uvin ahi.

**AUGUST 21:** Tunin sopi (L) Seiminthang Kipgen 14yrs S. Saheibung

B/ch (Gambih No. 7) a um chu tahsa damlouna jeh in ana molliem tan ahi. Gamsung boina tampi umjong leh Gambih Pastor in kilom tah in vuilem na ananei tan ahi. Pathen in insung mite lhamon jing taken

**AUGUST 22:** Centre church Tujangvaichong in Meithai holeh Ngailut umtah chatmo ho, Tibukim lou ho kithopina ngaiulutna natoh tongding in Nungahho leh Chate numeiho akalsong uvin Meithaite

1. Insung a um Kong le bel asutheng un
2. Avon u asop peh un
3. Insung leh invel asutheng uvin
4. Amaho asil ngim uvin ahi.

**AUGUST 22:** N. Mollen Baptist Church, KBC No. 1 munah (1) Meithai nikho (2) Anthah Lop (3) Mi gup tahsan twilutna ana kibol in ahi.

**AUGUST 23:** Kum 2020 sung hin thilsoh chom chom leh Covid-19 hin mihem kimanah na nasatah in houkhom, natoh na suboi jing jong le, Tuni 23 August Sunday hi KBC in Meithai te nikho a akiman na nikho ahitolhon in, Centre Church Tujangvaichong houbung mite in, pan akila khom in khosung a um leh umlou hijong le Meithai hojouse leh Tibukimlou, Tahsa Chatmo a umho jabol naleh Taopeh nikho in akimang in ahi. Kaikhomna a labung ngeitah tahjong asa uvin, Meithai holeh Tibukimlou, chatmo ho jouse tilkhouna leh taopehna Church Pastor in aneyin, mipi in jokham cheh in tokhom anei uvin, sum kimu jouse nikho kimanpeh ho chungah hop doh pehna Nute Lamkai ho in aneyin ahi. Chuleh meithai, Tibukimlou holeh chatmo ho jouse ngailut vetsah na in Pu. Sehminlen (Khosung Semangpa) leh insung mite in Thilpeh in kong khatcheh ape uvin, Khosung Inpipu akon injong tilkhouna nale thilpeh jong anei in ahi. Chuleh, Women Department leh changval a mi 45 in sum atokhom ho u Sum in hopdoh peh na anei uvin ahi.

Meithai holeh Tibukimlou, chatmo ho ngailut na jalla pan hila jouse leh houbung mite jouse chungah napha natohdoh na chung cheh uva kipa thu kahin seiye. Khosung kivaihopna leh Houbung sunga kivai hopna ho phatthei boh jing jeng taken. Muntin na sum le paiya pan hinla jouse Pathen in phatthei naboh tauhen. Mijouse chungah kakipana kahin phonge. Kakipah e. Pr. Mangcha Tuboi Church Pastor, Centre church Tujangvaichong.

**AUGUST 23:** Tuni Meithai nikho ahitolhon in Centre Church Salem Village Sapormeina Women Dept in Meithaiho nekhom le thilpeh abolpeh un, Meithai mi 50 vel ahung kikhom doh uve.

**AUGUST 23:** Phaichambung Gambih No. 16 munah meithai nikho lolhingtah in ana kimang chaitai.

**AUGUST 28:** Centre Church Joujangtek "Monthly Fasting Prayer" ana challha in ahi.

**AUGUST 28:** T. Phoilen, Gambih No. 11 a um Pu Paominthang in eina dalhah na chung uva Gambih Men Chairman Pu Thanglun Vai-pei in ponkhuna le taopehna ana nei in ahi.

**AUGUST 29:** KBC Gambih No. 4 Men Department kiphudoh kal 39 channa Gambih Lamkaicheng in ana mangkhom uvin Pathen thangvahna ana neikhom uvin ahi.

**AUGUST 29:** Kumlui December 4, 2019 nikhoa Tujangvaichong khosung a mei ya kon a Inn li (4) meiyin akahlhah ho chu tuni 29 August 2020 nikho in Pathen min in Thenso nale kot hon na kin chu akibol tan ahi. Pathen in umpi jing tauhen.

**AUGUST 29:** Ng. Hatmary Haokip (Lecturer, STS) in Album ana bol Saitu Baptist Church mun ah Rev. Dr. Paokhohao Haokip (Principal, STS) minister hinan thenso ahitai. ana kichoh cheh ute.

**AUGUST 30:** Twinom Baptist Church, KBC No. 9 munah tahsan twilut mi 9 chule dan ngai kichen kop 13 in ana bol tauvin ahi.

## BIBLE PUMPI KHUTJIH'A ANA JIHCHAI



Pu Zamkholal Zou, KBC Vice president chule tule tua KBC gambih No.16 Chairman jong hi in *Bible Cover to cover* phat sot tah lut'a ahin boipi chu jihchaina ana neitan, atom ngaina chung'a Kipat Thu sangtah in ahung kiphong in ahi.

# KUKI CHRISTIAN-HO THUSIM'A AMASAPENHO

(Lhakit leh banjom ding)

01. Rev. Dr Mangkhosat Kipgen chu Kuki Christian-ho lah'a Eastern Theological College (ETC) Jorhat mun'a Professor le Principal tuh masapen ahi.

02. Pu Dongkhothang Singson, MTh chu Kuki Christian-ho lah'a Manipur Bible Institute (MBI, tua MTC) a Principal masapen ahi.

03. Rev. Dr Hawlngam Haokip chu Kuki Baptist Christian-ho lah a MBC le CBCNEI a President masapen ahi.

04. Motbung Hou-in 1956 kum a Thensona ana kinei chu Kuki Baptist Christian-ho lah song (stone) a kisa Hou-in masapen ahi.

05. 1982 kum Imphal Deulahlane mun a Rev. Dr Dongkhothang Singson Principal masapen hina a ana kiphut doh "Trulock Theological Seminary" (TTS) chu Kuki Christian-ho lah a Theological Seminary kiphut doh masapen ahi.

06. Dated 22-26 February, 1965 a Tujangvaichong mun a Golden Jubilee ana kibol chu Kuki Baptist Christian-ho lah a Jubilee kibol masapen ahi.

07. Rev. Dr. Tongkhojang (T. Lunkim) chu Kuki Christian-ho lah a Holy Bible ledoh masapen ahin June 20, 1971 nikho a Molvom, Nagaland a Dr MP John, Auxiliary President, Bible Society of India panna a anakithenso ahi.

08. Pu Ngulhao Thomsong chun 1928 kum in Bible Kitepna Thah eipaovin analedoh in Kuki Christian-ho lah a New Testament ledoh masapen ahitai.

09. Dr Mangkhosat Kipgen lamkaina in March 12-15, 1977 nikho in Molvom houbung, Nagaland mun a Kuki Chin Mizo Theological Conference masapen ana kibol e.

10. Dr Hawlngam Haokip le Rev. Thangkhohal chu March 30, 1983 kum'a ana kiphutdoh Kuki Evangelical Churches Union (KECU) Chairman le Secretary masapen anahilhon in, Rev. Doujapao Haokip, Vice Chairman, D. Thangkholet Haokip, Asst. Secretary, Pastor L. Amang, Treasurer, Rev. Yangthong, Chief Editor masapen ahiue.



## LHAGAO HINKHO PUI HING THEI THUGOLHO

01. Christa tahsan nahileh nikhat leh Pathen in kipaman napeh ding ahi. Hiche kipamanho chu leisetna inatoh thilbol akon a kimudoh ahin, Hiche leisetna natohna chu eihon atoh ding dan kipe (1 Cor. 9:24) a kisei banga ibol dingu ahi.
02. Golsehna munna lhai kitetna akhun minute ni vel bou alut in Vannoi pumpia miminthang akisoh jiuvin ahi. Alhaipettah ukhu minute lhomcha kah ahivang in, akithemchuhnau khu kum 30/40 alhing jin ahi.
03. Hinkhoa phat hihen, lungthim hihen, ipi hileh akum akum a isuh-manghou hi Pakai Angsung mitphet kah louva tohphatman isanna ding'u ahi. Hiche nikho teng chule leiset na hinkho hi thusim hung kisoh intin, nang in tonsot kipana na mu ding ahi.
04. Na hinkhoa thil khat pen pen'a na lolhin pou pouleh hiche mun laitah achu mipi maiya na dindoh ding ahi.
05. Mitthah khun alha akimu pon chule ahoina jong akikhet poi, ahinlah midang invang alha le ahoina jouse amu thei uve akitin ahi. Eihong chutobang chu ina hinom jiuvin ahi.
06. Koi phung le chang, numei le pasal, hoi le hoilou in imacha apopoi, mihem jouse sunga lolhinna aum cheh in ahi.
07. Mihem khat hinkho man dan le hinaho kilah thei le chomkhat kah'a mang cha thei ihipouvin, eima eima hatna le hinna abou lam kijot cheh ding ahi.
08. Mi tamtah in midang hinkho hindan alah nom jeh uvin alolhing jou jipouvin ahi. Midang lunglutna le thanopna hilouva eima lunglutna le thanopna chepi hin lam eilhunsah jou dingu ahi.
09. Thil tamtah na bol jeh a thil tamtah na jou tai tina hilou ahi. Na toh le machalna kiti teni hi achom chom ahi. Mi kimkhat in ongman louvin aum uvin ahinlah machalna khatcha neilouva boi jong aum in ahi.
10. Na Title bouva na natoh leh na tohna mun akikhel tengleh imacha na bol thei tahlou ding ahi. Mi tamtah in, asum tam dan, akum tamdan le athep dan a thu kitan ahi, Pathen invang iti kibol em chule ipia kimang cha em tia thu atan ding ahi.

## CONDOLENCE



### Evangelist David Limbu

*Vangset umtah in Shikim Missionary pa Evangelist David Limbu in tahsa damo na khoh tah jeh a aleiset hinkho ana bei hi KBC Mission natohna a jong vangset umtah khat chu ahi. adalhah a-inneipi leh Chate Pasal khat le chanu khat ahi. Chapa hi kum 7 ahin chanu kum 5 ahinalaije. Pathen in adalhah Insung mite jouse lungmon na, lhamonna apah na ding in Houbung mite jousen taonan kop jing ute.*



### Pi Domkholhei Haokip

*Vangset umtah in August 8, 2020 nikho in Pi Domkholhei Haokip Age 92 chun atahsa haihu kichai in natkit louna thikit louna tonsot gam jon in ana Che masa tai. Pi Domkholhei hi Rev. Dr. Haoneo Haokip Principal Shalom Theological Seminary apenna anu ahi.*



### SPECIAL THANKS

Prepared by: D. Tablamingh Hingap

#### MEMO CONTRIBUTORS

1. N. Lariet Dengeal 2. P. D. Darnant Hingapin 3. M. Lantingning Hingapin  
4. S. Laker's Teachers 5. P. U. Gertang Chemsan 6. S. P. Pongpang Haska

#### Image Set

#### Album - Ngailutna Dihtah

SL.No.	Name of songs	Composer
1.	Ngailutna Dihtah	Larkia & Yane - Ng. Hainary Haska
2.	U'AJAR LA JIP	Larkia & Ng. Lantingning Hingapin
3.	See Paktor Kaling's	Larkia & Yane - Ng. Darnant Hingapin
4.	See Paktor Kaling's	Larkia - Ng. Hainary Haska
5.	Larkia Lantingning Hingapin	Yane - Ng. Lantingning Hingapin
6.	Yane Lantingning Hingapin	Larkia & Yane - Ng. Darnant Hingapin
7.	Yane Lantingning Hingapin	Yane - Ng. Lantingning Hingapin
8.	Yane Lantingning Hingapin	Larkia & Yane - Ng. Darnant Hingapin
9.	Yane Lantingning Hingapin	Larkia & Yane - Ng. Darnant Hingapin
10.	Yane Lantingning Hingapin	Larkia & Yane - Ng. Darnant Hingapin

#### SPONSORS

1. Ng. Hainary Haska 2. Ng. Lantingning Hingapin 3. Ng. Hainary Haska  
4. Ng. Hainary Haska 5. Ng. Lantingning Hingapin 6. Ng. Hainary Haska  
7. Ng. Hainary Hingapin 8. Ng. Lantingning Hingapin 9. Ng. Hainary Haska  
10. Ng. Hainary Haska 11. Ng. Lantingning Hingapin 12. Ng. Hainary Haska  
13. Ng. Hainary Haska 14. Ng. Hainary Haska 15. Ng. Hainary Haska  
16. Ng. Hainary Haska 17. Ng. Hainary Haska 18. Ng. Hainary Haska  
19. Hainary Haska Church 20. Hainary Haska 21. Hainary Haska 22. Hainary Haska

### Ngailutna Dihtah

Gospel Visual Album



In loving memory of (L.) P. U. Hainary Haska

Singer: Ms. Hainary Haska

Background Singer: Darnant Hingapin, Lantingning Haska & Laker's Hingapin



Post Regd. MNP/81  
Regd No. 18134/88



**KBC Events "KUMKIM AUDIT" Office Chapel hall  
mun a boina umlouvin ana chelha tai.**



**BC Missionary/Evangelist hon Elizah Prayer Mount a thingkeh tuna aneinau**

If undelivered, please return to  
**The Editor, KBC Thuso**  
KUKI BAPTIST CONVENTION  
Opp. DM College, Imphal - 795 001  
Contact: 9862633173